

**BOSNA I HERCEGOVINA**  
**FEDERACIJA BOSNE I HERCEGOVINE**  
**ZENIČKO-DOBOJSKI KANTON**  
**OPĆINSKI SUD U VISOKOM**  
**Broj: 041-0-SU-20-000733**  
**Visoko, 15.6.2020. godine**

Na osnovu člana 31.stav 1. Zakona o sudovima u Federaciji BiH ("Službene novine Federacije Bosne i Hercegovine" broj: 38/05, 22/06, 64/10, 7/13 i 52/14), Odluke Vlade F BiH o proglašenju prestanka stanja nesreće uzrokovane pojavom koronavirusa (COVID-19) na području Federacije BiH broj: 701/2020 od 29.5.2020. godine u vezi sa Odlukom Visokog sudskog i tužilačkog vijeća Bosne i Hercegovine broj: 08-02-2-1020-55/2020 od 30.4.2020.godine, predsjednik Općinskog suda u Visokom donosi

**PLAN**  
**liberalizacije mjera donesenih u Općinskom sudu u Visokom**  
**povodom epidemiološke situacije**

I

Liberalizacija mjera u organizaciji rada Općinskog suda u Visokom provodit će se u skladu sa Odlukama nadležnih kriznih štabova i drugih nadležnih organa za upravljanje epidemiološkom situacijom na teritoriji nadležnosti ovog suda.

II

U Općinskom sudu u Visokom su obezbjeđena dezinfekciona sredstava (korito za dezinfekciju obuće-dezobarijera na ulazu u zgradu suda, dozatori sa dezinfekcionim sredstvom za ruke), sredstava lične zaštite (zaštitne maske) za sva lica koja ulaze u zgradu suda (zaposleni i stranke).

Sud nije imao mogućnosti nabaviti sredstvo za bezkontaktno mjerenje temperature, u vezi s čim se blagovremeno obratio Ministarstvu za pravosuđe i upravu. Mjerenje tjelesne temperature svih koji ulaze u zgradu suda će se uspostaviti, nakon što se ovo sredstvo obezbjedi.

III

Sve osobe koje ulaze u sud, uposlenici, stranke i građani dužni su u zgradi suda nositi zaštitne maske i provoditi druge higijensko-epidemiološke mjere zaštite kao što su dezinfekcija obuće na

dezobarijeri, dezinfekcija ruku dezinfekcijskim sredstvom putem dozera postavljenog na ulazu u zgradu suda.

Zabranjuje se nepotrebno i duže zadržavanje u hodnicima suda. Za vrijeme boravka u sudu poštovati propisanu socijalnu distancu od 2 metra.

Međusobnu komunikaciju uposlenici će u pravilu obavljati elektronskim putem ili telefonskim putem umjesto neposrednih kontakata, gdje je god to moguće.

Raspored radnih stolova u kancelarijama pozicionirati na način da se ostvari preporučena fizička razdaljina od 2 metra.

Obvezuju se svi uposleni da redovito vrše provjetranje prostorija u kojima rade.

#### IV

Uposlenici ovog suda koji obavljaju poslove na održavanju čistoće poduzimat će adekvatne mjere pojačanog provođenja higijenskih mjera u radnim i pomoćnim prostorijama adekvatnim sredstvima za čišćenje i dezinfekciju prostora (radne opreme i površine, ručke na vratima i prozorima, slavine, prekidači za struju).

#### V

U Općinskom sudu u Visokom uspostavljeno je redovno radno vrijeme, kao i rad sa strankama i to, od 7,30 do 16,00 sati. Portir ovog suda će u koordinaciji sa Sudskom policijom sudova ZDK kontrolisati ulazak stranaka i drugih učesnika u postupku.

#### VI

Glavne pretrese, usmene rasprave i ročišta je moguće zakazivati u prostorijama gdje je moguće obezbjediti socijalnu distancu svih prisutnih od najmanje dva metra.

Na prvom mjestu potrebno je zakazivati otkazana ročišta i glavne pretrese, ročišta koja su zakonom propisana kao hitna, ročišta za izjašnjenje o krivici, ročišta za razmatranje sporazuma ili priznanja krivice te ročišta sa manjim brojem učesnika.

Prilikom zakazivanja ročišta i rada po predmetima sudije su dužne da se pridržavaju Plana rješavanja predmeta za 2020. godinu, obaveze rješavanja predmeta prema starosti inicijalnog akta vodeći računa o sprečavanju nastupanja zastarjelosti.

#### VII

Svi uposlenici suda dužni su da poštuju naredbe i preporuke nadležnih kriznih štabova i odluke i naredbe predsjednika suda a posebno da se pridržavaju preporuka epidemioloških, sanitarnih i drugih nadležnih institucija o korištenju zaštitnih sredstava, što obuhvaća: upotrebu korita za dezinfekciju obuće (dezobarijera) na ulazu u zgradu suda, upotrebu dezinfekcijskog sredstva za ruke na ulazu u zgradu suda, nošenje zaštitne maske, a sve u cilju zaštite osobnog zdravlja i zaštite javnog zdravlja radi sprečavanja širenja pandemije koronavirusa (COVID-19).

## VIII


Licima koja ne budu poštovala zaštitne mjere i ne budu nosila zaštitnu masku za lice biće zabranjen ulaz u zgradu suda, o čemu su obavezni voditi računa portir, odnosno radnik suda koji za to bude određen i službenici sudske policije.

## IX

Predsjednik suda je obavezan procijeniti opasnost i sigurnost po zdravlje ljudi i donijeti ad hoc odluke koje su u pogledu organizacije rada u sudu restriktivnije odnosno liberalnije od mjera iz ovog Plana.

## X

Plan liberalizacije mjera donesenih u Općinskom sudu u Visokom povodom epidemiološke situacije primjenjivat će se od dana donošenja.



### Dostavljeno:

- 1xUposlenicima putem e-maila,
- 1xNa oglasnu ploču i web stranicu Suda,
- 1xVSTV-u putem e-maila
- 1xKantonalnom sudu u Zenici, putem e-maila,
- 1xTužilaštvu Zeničko-dobojskog kantona,
- 1xMinistrastvu za pravosuđe i upravu Zeničko-dobojskog kantona, putem e-maila

